

後

漢

書

疏

證

後漢書疏證卷三

吳 沈欽韓撰

鄭興傳 漁陽太守郭伋可大司空者

郭伋傳伋爲并州牧朝廷多舉伋可爲大司空伋之牧并州在建武十一年以後而其守漁陽與興此疏則建武六七年間也疑公卿之舉本在伋爲漁陽時伋傳伋到范書往往如此

頃年日食每多在晦

襄二十四年經正義劉歆三統曆以爲五月二十二分月之二十乃爲一交以爲交在望前朔則日食望則月

食在前望後望則月食後月朔則日食文正在朔則日食既前後望不食交正在望則月食既前後朔不食按日食在晦此曆法用平朔而差也大衍曆議虞卿曰所謂朔在會合苟躋次既同何患於頻大也日月相離何患於頻小春秋日蝕不書朔者八公羊曰二日也穀梁曰晦也左氏曰官失之也劉孝孫推俱得朔日以邱明爲是乃與劉焯皆議定朔爲有司所抑不得行傳仁均始爲定朔詳唐曆志中

蓮勺令

一統志蓮芍故城在西安府渭南縣東北渭南縣志故

城在縣東北七十里卽來化鎮是

客授闕鄉

說文闐低目視也弘農湖縣有闐鄉廣韻二十文闐俗作闕前書孟康注古闕字從門中旻建安中正作闕蓋建安中改作闕非聞也此注亦誤爲聞一統志在今陝州闕鄉縣西縣志故城在縣西四十里

眾傳作春秋難記條例

隋志梁有鄭眾春秋左氏傳條例九卷公羊疏云鄭眾亦作長義十九條十七事專論公羊之短左氏之長欲爲通義

光武十王傳沛獻王輔作五經論時號之曰沛王通論  
通義亦此類如白虎通義是也

范升明者無不見聖者無不聞

文子道德篇聞而知之聖也見而知之智也故聖人常  
聞禍福所生而擇其道智者常見禍福成形而擇其行  
不可開口以爲人師

荀子宥坐篇今學會未如朮贅則具然欲爲人師

左氏不祖孔子而出於邱明

史記十二諸侯年表云魯君子左邱明懼弟子人人異  
端各安其意失其真故因孔子史記具論其語成左氏

春秋此可謂不祖孔子乎俗儒無溫故知新之明而有  
守愚不習之闇王充所謂擁鶯與盲不成人者也

老子曰學道日損

按元文作爲學日益爲道日損升亦未通老子

疑道不可由疑事不可行

荀子議兵必道吾所明無道吾所疑豈謂儒術哉商子  
更法篇疑行無成疑事無功趙策肥義言同

又曰正其本萬事理

說苑建本篇易曰建其本而萬物理失之豪釐差以千  
里大戴保傳篇亦引易曰云云盧辯注據易說言也今

攷易通卦驗有此文

陳元  
傳覆冒

字當爲覓說文覓突前也類篇覓觸也言其爲異家所  
蒙覆而凌突也與覆冒海隅義異

辟司空李通府

北堂書鈔華嶠書云元辟司空掾宋弘受罪上書訟之  
言甚切直攷本紀弘以建武六年免李通以建武七年  
爲大司空是陳元辟司空府當於宋弘時也

師臣者帝賓臣者霸

燕策郭隗先生曰帝者與師處王者與友處霸者與臣

處亡國與役處諸子並同

賈逵傳

以大夏侯尚書教授

按逵爲古學而教授仍用今文蓋祿利之塗非是則莫肯來學終漢之世兼通五經古學者惟賈馬鄭三君耳爲之解詁

隋志賈逵春秋左氏解詁二十卷春秋外傳國語二十卷又春秋左氏長經二十卷春秋釋訓一卷春秋左氏經傳朱墨別一卷

作神雀頌

論衡須頌云永平中神雀羣集詔上神雀頌百官上頌



文比瓦石惟班固賈逵傳毅楊終侯諷五頌金玉孝明

覽焉

高似孫緯畧漢明帝好畫別立畫官詔博洽之士班固賈逵等取經史事畫之起伏義凡五十謂之

畫贊

注

賈逵以爲紀季不能兄弟同心以存國乃背兄歸讐

按紀季事杜預亦云書字貴之不如賈說孔氏正義云劉賈謂紀季以鄫奔齊不言叛不能專鄫也則左氏先師並罪紀季義例相傳如杜預乃輕改家法叛同公羊耳

注

五大不在邊五細不在庭

按賈云五大謂太子母弟貴寵公子公孫累世正卿也

鄭眾云太子晉申生居曲沃是也母弟鄭其叔段居京  
是也貴寵公子若弃疾在蔡是也貴寵公孫若無知食  
渠邱是也累世正卿衛甯殖居蒲孫氏居戚是也五細  
賤妨貴少陵長遠閒親新聞舊小加大也不在庭不當  
使居朝廷爲政春秋戰國時事又與後世不同故趙安  
陽君封於代而作亂孟嘗君封於薛而外市韓非揚權  
云數披其木無使枝茂楚子使棄疾爲蔡公申無字言  
親者貴者宜居中疏者卑者宜處邊厯言貴戚大臣據  
邑之禍尋其文義瞭然可曉賈鄭據左氏本文條疏之  
義確不易杜預撥棄先儒而引五官五正等以解之於

無字陳戒本旨了無所關

明劉氏爲堯後者而左氏獨有明文

正義云伍員屬其子於齊使爲王孫氏者知己將死豫令改族士會之帑在秦不顯於會之身復無所辟傳說處秦爲劉氏未知何意言此討尋上下其文不類深疑此句或非本旨蓋以爲漢室初興捐棄古學左氏不顯於世無以自申劉氏從秦從魏其源本出劉累插注此辭將以媚於世明帝時賈逵云云竊謂前世藉此以求道通故復引以爲證耳愚按疏言非也或言錯簡者是也夫士會歸晉秦人已送其帑古者大夫違則有攝主

士會宗族先在晉可知安得舉族行而有處秦者乎襄  
二十四年范宣子云在夏爲御龍氏在商爲豕韋氏在  
周爲唐杜氏晉主夏盟爲范氏其處者爲劉氏當在此  
間也昭二十九年蔡墨言劉累懼而遷於魯然則處者  
謂劉累之後遷魯縣者也漢志南陽魯陽有魯山古魯  
縣御龍氏所遷左氏所以爲古學者以其先著竹帛漢  
儒安敢竄益語句若然異學之徒必加摘發左氏絕學  
益無以自明矣三代而後漢祚四百後莫能京性與天  
道豈無先幾左氏先師雖不爲漢實關啟漢之符此班  
賈諸儒所以表著之意也唐會要長安四年鳳閣舍人

劉知幾以漢氏爲陸終苗裔非堯之後務欲舐排前論  
苟樹頰牙知幾過矣

堯不得爲火德

尙書堯典正義鄭云三帛者高陽氏之後用赤繒高辛  
氏之後用黑繒其餘諸侯皆用白繒如鄭意推之舜以  
十一月爲正尙赤堯以十二月爲正尙白高辛以十三  
月爲正尙黑是堯不得爲火德也繁露三代改制篇同  
亦無少昊

弟子及門生

集古錄孔宙碑陰跋云親受業者爲弟子相傳授者爲

門生宙碑殘缺其稱弟子者十人門生四十三人此門生卽門人與後世以富家子弟爲門生執賤役者異矣  
注 千乘王伉章帝子也

諸本皆訛章爲宣

汝郁字叔異

文選

四十

注引東觀記作字幼異又

四十

引東觀記云

汝郁再徵載病詣公車尙書敕郁自力受拜郁乘輦白衣詣止車門臺遣兩當關扶郁入拜郎中按稽康書所謂當關呼之不置蓋臺省中當直給使若唐之省中亭長矣晉語史黯曰臣敢煩當日注云當日直日也言不

敢煩主君之直日以自白也當關義如此御覽五百九十九女

部亦云女郁字叔異事與注引誤以汝姓爲孝女李明

等慣慣可笑也

稱爲通儒

一論衡超奇篇能說一經者爲儒生博覽古今者爲通人

凡九篇

隋志賈逵集一卷梁有二卷

論 賈逵能附會文致最差貴顯

閻若璩曰隋志識緯篇云賈逵之徒獨非之與范史此論不合蓋隋志不詳考其傳奏而誤讀張衡疏內侍中

賈逵摘讖互異三十餘事諸言讖者皆不能說之文以爲逵首非讖不知逵第摘其互異處初無所非也愚謂唐初漢史猶備儒臣作志稱賈執正必非無據閻謂誤讀張衡之奏豈不能一覽賈逵之傳未有以彼爲誤讀以此爲未見者也既是張衡稱其糾摘則賈君必不傳會而言劉氏徒以讖緯偶與左同聊悟主德竊同喻諫范爲此誣殆是厚誣閻欲佞范復詆隋志所謂小智大愚也

張霸  
傳 張曾子

猶關西孔子之稱新唐書東夷傳百濟王義慈孝友時



稱海東曾子

松爲司隸校尉

公孫松缺謝承書有華松爲司隸校尉未知其人爲同異

能作五里霧

湖廣通志張楷有玉玦金匱之學坐在立亡之道人學其術者填咽如市故云霧市嘗跨驢至雲夢縣賣藥今縣有會仙橋

傳玄至輪氏

舊志潁陽鎮在河南府登封縣西南七十里漢輪氏縣

晉廢後魏天安二年改置潁陽縣於此

桓榮  
傳 龍亢人也

今鳳陽府懷遠縣有龍亢集懷遠縣志龍亢城俗名柴  
王城在縣西北七十五里

注 朱普字公文

東觀記作朱文剛

注 孔子行見皋魚

說苑家語作吾邱子金樓子引作虞邱子

食邑五千戶

東觀記作五百戶爲是

擁經而前

宋書禮志國子太學生執一卷經以代手版蓋明帝以弟子自處

賜冢塋於首山之陽

一統志首陽山在河南府偃師縣西北桓榮墓在此於山西蒲州府復云桓榮墓在永濟縣南四十五里首陽山於懷遠縣復云桓榮墓在龍亢集北五里統志存疑故複出如此

郁帝自制五家要說章句

五家謂歐陽林尊平當朱普桓榮也華嶠書作五行似

專言洪範五行非也姚本華嶠書作五經章句

切而不勤

大戴記保傳作切而不攘賈誼傳及新書作切而不媿

焉賜牛酒奪服

後世所謂奪情皇甫誕碑尋詔奪情復其舊任趙昇朝  
野類要云已解官持服而朝廷特再推用者名起復起  
復卽奪情也今人以禪後卽吉爲起復者誤按宋人署  
名爵多以起復入銜太平興國八年重修兗州文宣王  
廟碑題起復翰林學士呂蒙正奉敕撰是也又唐世大  
臣方鎮起復並假將軍之號示墨衰從戎之意徐度却

掃編富鄭公以宰相丁憂起復初授冠軍大將軍餘官授雲麾將軍宋制猶如此

封陽平侯

隋書地理志魏州華縣舊曰陽平一統志陽平故城今東昌府莘縣治

典傳注 遷平津都尉

平津都尉爲八關都尉之一

靈帝紀中平元年置劉氏刊誤謂平

津不得有都尉當是平準令此剗肉成瘡也

鸞糟食傳

類篇勞斲物未精也麤鹽之義爲糟文苑英華符載謝

李巽書糟心服道亦與此糟食同義糟食蓋苦食也

己吾長

一統志己吾故城在歸德府甯陵縣西南

碑傳一名嚴

水經注作儼云沛國桓儼避地會稽聞陳業履行高潔  
往候不見儼後浮海南入交州臨去遺書與業不因行  
李繫白樓亭柱而去

注 住止山陰縣故魯相鍾離意舍

嚴之止此亦甘棠之遺思也近一統志載流寓人物直  
云桓嚴止山陰鍾離意家是以鍾離意爲同時人也

注 移居揚州從事屈豫室中

謝承書云罷鄧縣居之

彬  
傳父麟

天中記文士傳云桓麟年十三四在伯父太尉焉坐焉  
告客曰此吾弟子有異才殊能作賦客爲詩曰甘羅十  
二楊烏九齡昔有二子今則桓生麟應聲曰邈矣甘羅  
超等絕羣伊彼楊烏命世稱賢嗟予蠢弱殊才偉年仰  
慙二子俯愧過言

凡二十一篇

舊唐志桓麟集二卷文心雕龍雜文篇自桓麟七說以

下左思七諷以上枝附景從十有餘家御覽八百五十桓麟  
七說曰香蕒爲飯雜以粳菰散如細蜺搏如凝膚北堂  
書鈔亦多引桓麟七說

所著七說

按此乃彬父麟所著已見上御覽五百九十傳玄七林序曰

枚乘作七發傳毅劉廣崔駰李尤桓麟崔琦劉梁桓彬

之徒承其流而作之者紛焉七激傳七依崔駰七說桓麟

蠲崔琦舊說七舉劉七誤應謨之篇按彬所作蓋七謨

也北堂書鈔七謨是傳玄作然玄自敘作七林書鈔誤

也



後漢書通志卷三  
丁鴻徙封陵陽侯

一統志陵陽故縣在池州府石埭縣東

徙封魯陽鄉侯

錢大昭補表章懷注引東觀記云在尋陽郡誤考尋陽乃廬之屬縣非郡也按章帝以六安國建徙鴻爲馬亭侯則魯陽鄉在尋陽縣

注 太常樓望

初學記江徽陳留志曰樓望字次子少受春秋於少府丁子然

背王室向私門

韓非有度篇數至能人之門不一至主之廷商子壹言  
篇私勞不顯於國私門不請於君

源自涓涓 起於蔥青

六韜守土篇涓涓不塞將爲江河兩葉不去將用斧柯  
說苑敬慎篇作青青不伐將尋斧柯

天不可以不剛不剛則三光不明王不可以不彊不彊則  
宰牧從橫

繁露天地之行篇天不剛則列星亂其行立不堅則邪  
臣亂其官星亂則亡其天臣亂則亡其君

論 君子立言非苟顯其理

按此論皆華嶠之辭袁宏紀載之呂覽懷寵篇凡君子之說也非苟辨也士之議也非苟語也必中理然後說必當義然後議

張宗傳令各探之

文子符言使信士分財不如定分而探籌

一卒畢力百人不當萬夫致死可以橫行

吳子勵士篇一人投命足懼千夫尉繚子兵教篇必死則生萬人被刃橫行天下

雖欲勦力其勢不全也

孫子謀攻篇用兵之法少則能逃之不若則能避之故

小敵之堅大敵之禽也吳子圖國篇雖有關心隨之死  
矣

中牟貫胛

牟當是矛一切經音義鉞盾有作牟非字體又作鉞按  
此誤省金旁耳長阿含經四天子手執戈鉞

潁川桑中

樂記鄭注桑閒在濮陽劉昭續志注引博物記桑中在  
濮陽按其地不連潁川明統志桑落在開封府陳州界  
卽孔子絕糧處按荀子宥坐篇孔子厄於陳蔡之閒孔  
子曰由女安知吾不得之桑落之下疑此桑中

傳法雄子孫不敢稱田姓

按以法爲氏亦子孫偶然者耳若以畏秦不敢稱田姓則田儋田千秋者何自來乎

兵凶器戰危事

越語范蠡曰兵者凶器也戰者逆德也文子下德篇云怒者逆德也兵者凶器也越世家尉繚子兵令並同淮南道應訓以爲屈宜若語吳起也

虎害稍息

方輿紀要虎渡口在荊州府西南二十里志云龍洲南有虎渡里後漢時郡守法雄有異政猛虎渡江去因名

初平中卒官

汪文盛本作元初此誤

滕撫傳 磐牙連歲

牙當作互

陰陵人

一統志陰陵故城在鳳陽府定遠縣西北

築營於當塗山中

注云在宣州者非也舊唐志宣州當塗縣漢丹楊縣地屬丹楊郡晉分丹楊置於湖縣成帝以江北流人寓居於湖乃改爲當塗縣沈約州郡志當塗令晉成帝世與

浚道俱立爲僑縣南齊志云宋永初二年分淮東爲南  
豫州泰始三年治宣城其淮南郡領於湖當塗等縣宣  
城郡自領廣德以下縣隋志宣城郡舊置南豫州平陳  
改爲宣州當塗縣舊置淮南郡輿地廣記武德八年屬宣州是唐之  
宣州當塗非漢之九江當塗也漢當塗縣乃唐之濠州  
鍾離縣元和志當塗故城在鍾離縣西南一百七十里今鳳陽府懷遠縣一統  
志塗山在懷遠縣東南八里淮河東岸亦名當塗山明  
統志云與荆山對峙

### 攻燒東城縣

隋志鍾離郡定遠舊曰東城元和志東城縣故城在濠

州定遠縣東南五十里今鳳陽府定遠縣

爲平鄉侯

一統志平鄉故城在今順德府平鄉縣西北

督揚徐二州事

宋書百官志建安中魏武帝爲相始遣大將軍督軍二十一年征孫權還夏侯惇督二十六軍是也文帝黃初二年始置都督諸州軍事攷范書於滕撫馮緄公孫瓚等已言督諸州軍事不始於魏羅隱錢氏大宗譜富春侯讓傳云太尉趙峻辟公爲掾遷黃門侍郎時九江猾寇周生范客作亂詔拜廣陵太守征東大將軍持節都



督江左六郡諸軍事按彼事雖無稽然言都督軍事不足怪也

馮緄  
傳字鴻卿

金石錄車騎將軍馮緄碑云字皇卿

宕渠人

一統志宕渠故城在順慶府渠縣東北寰宇記其城後漢車騎將軍馮緄增修俗名車騎城

少學春秋司馬兵法

碑云少習父業治春秋嚴韓詩倉氏

爲春秋者嚴氏爲韓詩者倉氏皆本

其家法也然兩漢儒林傳無倉氏

父煥安帝時爲幽州刺史

隸釋有元初六年十二月賜幽州刺史馮煥詔洪氏云煥有墓闕題云豫州幽州刺史馮使君神道必是自豫徙幽而賜此詔煥猶在豫故其前尙稱故官也

七遷爲廣漢屬國都尉

碑云舉孝廉除右郎中蜀郡廣都長舉尤異遷犍爲武陽令趙明誠曰據碑自舉孝廉至爲廣漢屬國都尉凡十一遷而爲中丞舉督使徐揚二州皆在爲都尉前

遷隴西太守

碑云爲隴西太守坐問吏辜旬不分

今之保辜限

去官以羌

駭動爲四府所表復家拜隴西太守

遷廷尉

趙明誠曰緄爲遼東太守以前嘗爲治書侍御史遷尙書遂爲廷尉未嘗拜京兆尹及司隸校尉也

不復內御

三畧軍勢日出軍行師將在自專進退內御則功難成勢得容姦伯夷可疑四句

商子畫策篇勢不能爲姦雖跖可信也勢得爲姦雖伯夷可疑也

斬首四千餘級

碑云南征五谿蠻夷黃加少高相法民趙伯潘鴻等斬首萬級

盜賊復發策免

碑云臨當受封以謠言奏河內太守中常侍左悺弟坐遜位

帝不納復爲廷尉

按傳三言緄爲廷尉而碑則一爲廷尉於車騎將軍之前一爲廷尉於末此處廷尉衍文也

誹章誣緄

碑云以表荊州刺史李隗南陽太守成瑨太原太守劉

瑱黨錮及陳蕃不宜以重論坐正法作左校

復為廷尉卒於官

碑云復廷尉奏中官子弟不宜典牧州郡獲過左右遜位永康元年薨攷皇甫規傳永康元年夏日食應詔言劉祐馮緄正直多怨流放家門緄卒於是年則知已經罷斥非卒官也明矣凡此當以碑為正傳詮次厯雜以緄傳推之則他傳可知水經注潛水云宕渠縣有車騎將軍馮緄桂陽太守李溫冢二子之靈常以三月還鄉漢水暴長郡縣吏民莫不於水上祭之今所謂馮李也

度尚除上虞長

袁宏紀曰尚初為上虞長縣民故洛陽市長潛于翼學

問淵深大儒舊名常隱於田里希見長吏尙往候之晨  
到其門翼不卽相見主簿白還不聽停車待之翼哺乃  
見尙尙宗其道德極談乃退其優賢表善皆此類也按  
以續漢書謝承書及袁紀核度尙爲人非不修學行者  
也未有己無學行而能優賢表善者也范之傳首類是  
誣善

遷文安令

一統志文安故城在順天府文安縣東縣志今縣東北  
柳河鎮有古城上有漢縣令趙夔祠卽文安故城也

豫章艾縣人

方輿紀要艾城在南昌府甯州西百里地名龍岡坪隋省人建昌縣

封右鄉侯遷桂陽太守

金石錄荊州刺史度尙碑云封右鄉侯遷遼東太守拜中郎將復拜荊州刺史以故秩居碑不言爲桂陽又不言卒於遼東太守趙明誠曰皆史之誤

注 鳥語謂語聲如鳥也書曰島夷卉服

錢大昕曰禹貢島夷漢書地理志作鳥鄭王本皆同故覃懷引以證鳥語之義後人依今本改鳥爲島而此注遂成贅文矣

擊太山賊公孫舉等

以紀傳參攷平公孫舉者段熲也平叔孫無忌者宗資也抗徐爲宗資司馬作公孫舉者誤

會赦見原

通鑑考異曰檢帝紀此後未有赦不知會何赦也

死爲餒鬼

大智度論十三鬼有二種餒鬼餓鬼餓鬼如天受樂但與

餓鬼同住

磐字子石丹楊人

北堂書鈔謝承書云張磐爲廬江太守以操行清廉見



稱京師諺曰問清白張子石又云潯陽令嘗餉磐柑一

奩其小男年七歲就取一枚與之御覽果部作橘謝承書曰磐奪取付還卒

以兩枚與之乃鞭卒磐奪兒柑鞭卒曰何行賂於吾子

楊璇兄喬傳

謝承書楊喬字聖達一本作楊高字聖建按高乃高隸體之訛聖達又作聖建姚本誤析

爲尙書侍郎轉左丞自在臺閣閑練漢家故事前後上

表陳國政便宜拜尙書夙夜周慎退食自公儀表偉麗

每朝賀百僚側目

排囊

排字本爲囊一切經音義云又作鞞排二形謂鍛家用

吹火令熾者也

噉臂出血書衣爲章

天中記

八三十

謝承書曰乃齧臂出血以簿中白毛筆染

血書帛按彼誤出毛字宋書禮志今之手版則古笏矣  
尙書令僕射尙書手版頭復有白筆以紫皮裹之名笏  
釋名簿笏也

劉平等  
傳序

史通序例篇華嶠後漢多同班氏劉平江革等傳其序  
先言孝道次述毛義養親此則王貢傳體其篇以四皓  
爲始也嶠言詞簡峻敘致溫雅其宗旨亦孟堅之亞歟

爰洎范曄始革其流遺棄史才矜銜文采今按此篇章  
懷注云並略華嶠之詞劉之所譏謂范之他篇歟

八月加賜羊酒

禮高年以八月者春饗孤子秋食耆老之義也唐會要  
六十貞元初前左散騎常侍邱爲致仕還鄉特給祿俸  
之半旣丁母喪蘇州疑所給請於觀察使韓滉以爲致  
仕特給祿俸惠養老臣也不可以在喪爲異命仍舊給  
之惟春秋羊酒之直則不給則唐亦循漢制加賜羊酒也

劉平  
守甯邱長

一統志甯邱廢縣在宿州東北六十里

爲老母求菜

呂覽慎人篇孔子窮於陳蔡之間顏回擇菜於外

拜全椒長

北堂書鈔續漢書云平爲全椒長先是縣多虎平到政  
術治民虎皆南渡江去

王望望之專命法有常條

唐擅興律諸應調發雜物供給軍事者皆先言上待報  
違者徒一年按此謂分內度中事但不應不待命耳若  
非分內度中事自當從重論也

王扶國相張宗

不其侯相也伏湛封不其侯

趙孝父普

前書王莽傳作並

有長者客精灑待之

按長者指孝之父父爲貴官故以孝爲有長者客馬文淵云但畏長者家兒正與此義同也意林引風俗通云今呼權貴作長者魏文帝詔三世長者知被服五世長者知飲食言家世富貴也注以孝爲長者非也

尋到矣於是遂去

御覽一百八十六東觀記曰但稱書生寄止於亭門塾

孝弟禮

北堂書鈔東觀記云孝得穀炊將熟時弟他出至暮始同孝待之同飯雖蔬食菜羹兄弟怡怡初學記又引云粟炊將熟使弟與妻偕出己夫妻先食菜茹及弟歸云己食矣令弟妻同食飯也

齊國兒萌子明

論衡齊世篇琅邪兒子明兄死收養其孤愛不異於己子歲敗穀盡不能兩活餓殺其子活兄之子臨淮許君叔亦養兄孤子歲倉卒之時餓其親子活兄之子與子明同義按東觀記亦云齊國臨淄人論衡云琅邪誤也

淳于注 在今密州安邱縣東北

舊唐志乾元二年刺史殷仲卿奏請治於故昌安城因  
改爲輔唐縣方輿紀要淳于城在青州府安邱縣東北  
三十里古淳于國也

里落化之

御覽四百三東觀記曰恭家井在門外上有盆隣里牧牛

而爭飲牛恭惡其爭多置器其上爲預汲水滿之小兒  
復爭恭乃語其家父母父母怒禁之里落皆化而不爭  
注 黔陬故城在今密州諸城縣東北

通志黔陬城在萊州府膠州西南七十里漢置黔陬縣

屬琅邪郡兩城夾水而立後移於膠水西相去三十里  
紀要云俗名故城爲東陬而此城爲西陬一統志膠山  
在膠州西南一百二十里水經注膠水出黔陬縣膠山  
是也

江革傳 縣當案比 注 猶今貌閱也

明謂之黃冊今謂之排門冊唐六典戶部每歲一造計  
帳三年一造戶籍每定戶以中年造籍以季年州縣之  
籍恆留五比省籍留九比九比冊府四百八十六作三比唐戶律疏議  
里正之任掌案比戶口收手實造籍書按唐制則周官  
三年大比之事也據鄭司農云漢時八月案比則漢一



歲一閱也北史裴蘊傳遷戶部侍郎時戶口多漏溢素知其情因是條奏皆令貌閱若一人不實則官司解職冊府元龜隋開皇三年四方疲人或詐者或小規免雜賦高祖乃令州縣大索貌閱戶口不實者正長遠配則天延載元年八月敕諸戶口計年將入丁老疾應免課役給侍者皆縣親貌形狀爲定簿

劉般  
傳  
杼秋侯

舊志杼秋故城在徐州碭山縣東六十里

居巢侯

一統志居巢故城在巢縣東北五里寰宇記古居巢城

陷爲巢湖

區種增耕

齊民要術汜勝之書區種法曰湯有旱災伊尹作爲區  
田教民糞種負水澆稼區田以糞氣爲美非必須良田  
也諸山陵近邑高危傾坂及邱城上皆可爲區田區田  
不耕旁地庶盡地力凡區種不先治地便荒地爲之以  
畝爲率令一畝之地長十丈廣四丈八尺當橫分十八  
丈作十五町町間分爲十四道以通人行道廣一尺五  
寸町皆廣一尺五寸長四丈八尺尺直橫鑿町作溝溝  
一尺深亦一尺積穰於溝間相去亦一尺嘗悉以一尺  
地積穰不相受令弘作二尺地以積穰種禾黍於溝間  
夾溝爲兩行去溝兩邊各二寸半中央相去五寸旁行

相去亦五寸一溝容四十四株一畝合萬五千七百五十株種禾黍令上有一寸土不令過一寸亦不可令減一寸凡區種麥令相去二寸一行一溝容五十二株一畝凡四萬五千五百五十株麥上土令厚二寸凡區種大豆令相去一尺二寸一溝容九株凡六千四百八十株上農夫區方深各六寸相去九寸一畝三千七百區一日作千區區種粟二十粒美糞一升合土和之畝用種一升秋收區別三升粟畝收百斛丁男長女治十畝十畝收千石歲食三十六石支二十六年食

中農夫下農夫收粟

具如章懷注

賈思勰曰諺曰頃不比畝蓋謂多惡不如少善

也昔兗州刺史劉仁之老成懿德爲子言曰昔在洛陽  
於宅田以七十步之地域爲區田收粟三十六石然則  
一畝之收有過百石矣少地之家所宜遵用也晉書段  
灼傳鄧艾爲區種之法元史食貨志至元七年頒農桑  
之制田無水者聽種區田其有水田者不必區種仍以  
區田之法散諸農民續通考泰定二年左丞趙簡請行  
區田法於內地陸燿切問齋文鈔孫宅揆區田說曰康  
熙丁亥桂林朱蘊叔爲蒲令邑處萬山中高陵陡坡非  
雨澤不能有秋爰取區田法試之後爲太原司馬在平  
定亦然收每區四五升畝可三十石於是爲圖說刊布

之

傳愷致國弟憲追亡七年

按前文愷自建初三年讓爵至和帝永元十年歷二十一年而詔文乃云七年必有誤

代周章爲太常

藝文類聚華嶠書愷爲太常論議常引正大義諸儒爲之語難經伉伉劉太常

辯章百姓

辯當爲辨江聲曰采古辨字僞孔本作采其傳解爲平按說文采又作而說文平字古文作采采相似後學遂

誤認米爲古文平唐明皇帝改僞孔之隸古從俗文遂作平字繇是承譌襲謬久矣今知當爲米者說文米部云米辨別讀若辨又鬥部齊字說云米古文辨字據鄭注云辨別則鄭本作辨史記作便者音同假借索隱曰今文作辨章則漢時尚書皆作辨繇是卽知古文之爲米矣按江氏以米字至唐方改爲平然俗書漢魏盛行恐不能待至唐不必泥衛包所云明皇改隸古爲今體時也王鳴盛云僞孔誤爲平遂訓爲和并洪範王道米米亦改爲平詩平平韓詩作便便云閑雅兒毛傳云平平辨治也襄十一年左傳引詩作便蕃左右爾雅云便

便辨則詩亦當作采而洪範雙聲與詩正同

三輔黃圖便門一作

平門亦采字之訛耳

陸德明孔穎達徐廣

史記注

皆不識采而誤認

平亦有便音唐韻二仙平房連切云辨治也十二庚平符兵切云正也和也易也俱誤認平可兩讀唐宋以來宰輔銜名皆誤用平章而世無識采字者矣愚按文書以通世事隨時宜者也說文雖言古辨爲采世既不識采之爲辨則廢而不用可也古今變革大端非一周官周禮一切隔閼而難行獨於區區點畫之間奉許氏爲聖師何其惑哉若江聲以篆寫尙書刊行此可謂自怡悅而不堪持贈者也

會馬英策罷

按帝紀作馬英薨

以輕從重

以罪人連染則坐之輕者減吏終身禁錮則坐之重者  
令子孫同禁錮是爲以輕從重也

周磐傳徵士變之宗也

御覽

四百十四

汝南先賢傳江夏都尉遺腹子也

汝墳之卒章

列女傳周南大夫妻作言生於亂世不得道理而迫於  
暴虐然而仕者爲父母在故也劉向治魯詩者其說與



薛君韓詩說正同又韓詩外傳枯魚銜索一章引詩雖則如燬父母孔邇與韓詩小異其大旨爲父母而仕則同

乃解韋帶

注以未仕服韋帶旣仕服革帶求之經典了無佐證凡稱革帶皆以韋爲之然云解韋帶爲求仕者泛謂儒生被服也莊子盜跖篇冠枝木之冠帶死牛之脅則儒生冠服固如是矣

重合令

通志重合城在武定府樂陵縣東南境今謂之重合鄉

蔡順少孤養母

初學記周斐汝南先賢傳曰順奉養母甘口之物不敢  
先嘗母至婚家因飲酒變吐順恐中毒乃嘗其吐母生  
瘡出膿以口嗽之

乃噬其指順卽心動

論衡感虛篇傳書言曾子之孝與母同氣曾子出薪於  
野有客至而欲去曾母曰願留參方到卽以右手搯其  
左臂曾子左臂立痛卽馳至問母臂何故痛母曰今者  
客來欲去吾搯臂以呼汝耳曰此虛也夫孝悌之至通  
於神明乃謂德化至天地俗人緣此而說言孝悌之至

精氣相動如曾母臂痛曾子臂亦輒痛曾母病曾子亦病曾母死曾子輒死乎愚按充之辯雖肆然蔡順此事適與之同卽疑漢人依託古事陳陳相因虛飾板狀以邀旌賁此劉知幾所以疑古也

### 太守韓崇

謝承書韓崇遷汝南太守詔引見賜車馬劔革帶上敕曰汝南朕之腹心任次京師也

### 趙咨 傳 計日受奉

北堂書鈔謝承書曰趙咨爲東海相人遺其雙枯魚噉之三歲不盡以儉化俗

乃言敕子

按班固爲楊王孫傳載其薄葬之命特承汰侈無度之極故列此一篇以爲諷勸且楊王孫一飲食男女之人出諸其口爲難得以見世之英主賢臣或時有蔽乎此若通人名士不必因此取重可從畧也范於此傳喋喋不休是亦未識班生之旨矣

復重以牆嬰之飾

衛湜禮記集說嚴陵方氏曰牆以帷柩而周圍如牆嬰以飾柩而翼蔽如羽

注 天子七重

七當作五

陳大夫設參門之木

上云殉葬此則檀弓所稱陳乾昔命其子大爲我棺使  
二婢子夾我

二妃不從

二當作三鄭云舜不告而娶不立正妃但三妃而已

班彪傳扶風安陵人

錢大昕曰班超傳云扶風平陵人必有一誤

爲廣平太守

前書敘傳作廣平相注名州永平縣當作洛州永年縣

一統志廣平故城在廣平府雞澤縣東二十里今有舊城村漢置廣平縣爲廣平國治隋改曰雞澤

劉季逐而羈之

按隗囂起兵奉祠高廟稱臣彪在隗氏時囂猶陽奉漢何至直稱其字此與諸將勸進光武而云伯升皆史文之誤

注 好事者謂揚雄劉歆陽城衛緒少孫史孝山

衛應是衡之誤御覽

八百十五

桓譚新論曰陽城子張名衡

蜀郡人論衡對作篇陽城子張作樂揚子雲造玄

通志畧引

風俗通陽城氏漢有諫議大夫陽城公衡卽其人衍公字

史通正史篇諸好事者若

馮商衛衡揚雄史岑梁審肆仁晉馮段肅金丹馮衍韋  
融蕭奮劉恂等相次撰續迄於哀平猶名史記至建武  
中司徒掾班彪以爲其言鄙俗不足以踵前史又雄歆  
毀美僞新誤後惑衆不當垂之後代者也此二語當亦  
班彪本語今  
范傳刪於是采其舊事旁貫異聞作後傳六十五篇按  
去非是  
史通上論作者人名若晉馮段肅馮衍諸人雖據東觀  
記然不先於班彪又脫陽城而重出衛衡則此人竟爲  
莫須有矣

序貨殖

史通雜說上太史公述儒林則不取游夏之文學著循

吏則不言冉季之政事至於貨殖爲傳獨以子貢居先  
成人之美不其闕如

傳曰殺史見極

疑謂崔杼殺太史事

司徒玉況府

是時司徒上有大字

五日一朝

宋史眞宗紀依漢唐故事五日一受朝遇慶會皇太子

押班

宋本宰相押班

望都長



舊志望都故城在保定府慶都縣西北三十里

所著賦論書記奏事合九篇

文選有北征賦藝文類聚有班彪悼離騷其他並見兩書舊唐志班彪集二卷

固傳注 謝承書曰固年十三王充見之拊其背謂彪曰此兒必記漢事

按充著論衡數稱班固其案書篇云今尙書郎班固其對作篇自言於建初初奏記郡守則充爲掾固已爲郎名輩在先豈得云充拊班固背呼爲小兒乎蓋謝承書本多虛誣而充其鄉里先輩務欲矜夸不知其乖謬也

光名宣於當世

詩皇矣傳光大也尸子明堂篇非求賢務士而能致大名於天下者未之嘗聞也

扶風掾李育

御覽

四百十六

謝承書曰李鴻字奉遜體性仁孝友於兄弟

育爲人所侵辱育後陰結客報怨爲執法吏所得當伏罪時未有立嗣鴻爲太尉掾在京師傷育以義刷恥門戶斷絕因分代育遂劾印還歸欲過家恐見妻子虧移其意到縣北亭預作記乞代育通記便飲酖而死縣令省記怛然驚感矣按此條不載郡望攷御覽四百汝南

先賢傳李鴻字太遜上蔡人則非此扶風李育之兄也

注 舟人吉桑

按新序一作固桑說苑尊賢作古乘韓詩外傳六作盍  
胥古今人表作古來循吏傳注作古桑乘來皆桑之誤  
吉又爲古之誤

司隸從事孟異

史通正史篇作孟翼按孟翼卽馬援傳中人作異誤

共成世祖本紀

史通覈才篇昔傳玄有云觀孟堅漢書實命代奇作及  
與陳宗尹敏杜撫馬嚴撰中興紀傳其文曾不足觀豈

拘於時乎不然何不類之甚也按論衡須頌篇陳平仲紀光武班孟堅頌孝明漢家功德頗可觀見陳平仲卽陳宗字也

至於六世史臣

六世句絕注家誤連

至建初中始成

梁書劉之遴傳鄱陽王範得班固所上漢書眞本獻之東宮之遴具異狀十事有曰案本漢書稱永平十六年五月二十一日己酉郎班固上而今本無上書年月日事按之遴所狀則漢書成於永平十六年而此云建初

中始成若眞本果可憑此傳乃爲虛謬

七相五公注 韋賢爲大司馬

按百官表當云韋賞王氏小學紺珠亦沿誤

其陽則崇山隱天

程大昌雍錄終南山橫互關中南面西起秦隴東徹藍

田凡雍岐郿

以上鳳翔府

鄠長安萬年相去八百里連縣峙

踞其南者皆此一山胡三省曰關中有南山北山自甘泉連延至截嶺九變爲北山自終南太白連縣至商嶺爲南山

注 秦始皇於上置林光宮

三輔黃圖林光宮胡亥所造從廣各五里在雲陽縣界  
注言始皇誤

### 鄭白之沃

一統志鄭白渠在西安府涇陽縣西北鄭渠故道自縣  
西北仲山分涇水東流厯今三原富平蒲城諸縣界入  
於洛久廢白渠自鄭渠北鑿南岸分涇水東南厯高陵  
櫟陽注於渭自此而南分爲大白中白南白三渠宋大  
觀中於白渠北鑿豐利渠元於豐利渠北鑿石渠名王  
御史渠明成化中又於石渠北鑿廣惠渠俗名龍洞渠  
皆引涇水分注涇陽三原醴陵高陵臨潼諸縣統名涇

渠詳在前書溝洫志疏證

放泰紫之圓方

易乾鑿度太一取其數以行九宮四正四維皆合於十五注太一出入所游息於紫宮之內外按此泰紫卽謂泰一紫宮四正方而四維圓注謂太微方而紫宮圓非也

左城右

三輔黃圖注右乘車上故使之平左以人上故爲之階類篇城階級也

增榮業峨

五臣注呂延濟曰增槃閣名顧炎武宅京記曰漢室閣  
記未央宮有增盤閣然上敘殿名已訖此不應溢出一  
閣非也

乘茵步輦

衛宏漢舊儀皇后婕妤乘輦餘皆以茵四人輿以行

合歡增成安處常寧茝若椒風披香發越蘭林蕙草鴛鴦  
飛翔之列

三輔黃圖武帝時後宮八區有昭陽飛翔增成合歡鳳  
皇鴛鴦等殿後有增修安處常寧茝若椒風發越蕙草  
等殿爲十四位宅京記昭陽舍蘭房椒壁西京雜記昭



陽殿織珠爲簾風至則鳴如珩佩之聲

又有天祿石渠

三輔黃圖石渠閣蕭何造其下礮石爲渠以導水若今

御溝因爲閣名漢宮殿疏云天祿麒麟閣蕭何造以藏

祕書處賢才也

按宣帝甘露中諸儒戴聖聞人通漢等雜論五經同異於石渠閣劉向揚雄並

校書天祿閣

衛以嚴更之署

三輔黃圖虎威章溝皆署名漢有長水中壘屯騎虎賁

越騎步兵射聲胡騎八營宿衛王宮周廬直宿處

自未央而連桂宮北彌明光而緌長樂

三輔黃圖云桂宮武帝造周回十餘里關輔記云桂宮在未央北中有明光殿土山複道從宮中西上城至建章神明臺蓬萊山明光宮太初四年起在長樂宮後南與長樂相連鴈程大昌雍錄曰自惠帝以後人主皆居未央而長樂常奉母后凡語及長樂者多曰東朝寶嬰傳東朝廷則其名固已分乎正宮矣此外如建章桂宮北宮之類雖在都城亦離宮也又云漢有明光宮三一在北宮南與長樂相連卽王商所欲借以避暑者也別有明光宮在甘泉宮中雲陽縣界亦武帝所起發燕趙美女三千人充之至尙書郎主作文書起草更直於建禮門內則

近明光殿矣建禮門內得神仙門神仙門內得明光殿約其方鄉必在未央正宮殿中則臣下奏事之地也

別風之嶢嶢

三輔黃圖鳳皇闕漢武帝造高七十七丈五尺鳳皇闕亦名別風闕又名嶢嶢闕在圓闕門內二百步宋敏求長安志建章宮有折風闕嶢嶢闕薛綜注次門女闕也在圓闕門內二百步據黃圖卽以爲鳳闕非也賦於上已云璧門之鳳闕明爲鳳皇闕此別敘云內明在鳳闕內也

駘蕩馭娑枌詣天梁

三輔黃圖駘蕩春時景物駘蕩滿宮中也駟娑馬行疾  
兒馬行迅疾一日之間徧宮中言宮之大也枌詣木名  
美木茂盛也天梁梁木至於天言宮之高也通雅枌詣  
卽櫪也

神明鬱其特起

長安志漢宮閣疏神明臺高五十丈上有九室常置九  
天道士百人

唐中太液

三輔黃圖唐中池周回二十里在建章宮太液池之南  
靈草冬榮神木叢生

拾遺記瀛洲有樹名影木月中視之如列星萬歲一實  
食之輕骨上有枝葉如華蓋有草名芸苗狀如菖蒲食  
葉則醉食根則醒又西京雜記太液池邊皆是彫胡紫  
籜綠節蒲叢生蒲

仙掌承露

淮南時則訓天子服八風水注云取銅槃中露水服之  
八方風所吹也然此亦古制

六師發胃

文選作逐義拙說文紂馬緒也胃爲紂之誤後人妄改  
要訣追蹤

說文馱馬行兒集韻一曰疾也

風毛雨血

說苑辯物篇雨血三日鷲鳥擊於上也

注 許少秦成並未詳

許少蓋許伯秦成蓋秦堇父

登龍舟

三輔黃圖昆明池中有龍首船常令宮女泛舟池中張  
鳳蓋建華旗作權歌雜以鼓吹帝御豫章觀臨觀是也  
又拾遺記昭帝穿琳池以文梓爲船木蘭爲柁刻飛燕  
翔鶴飾於船首隨風輕漾畢景忘歸

握乾符闢坤珍

詩文王序正義春秋說題辭云河以通乾出天苞洛以流坤吐地符

披皇圖

易通卦驗云燧人始握機矩表計宜御覽七十圖其刻

曰蒼渠通靈

渠官本作牙

必犧方牙蒼精作易無書以畫事

鄭注云燧皇在伏羲前作其圖謂之計冥時無書刻石而謂之且刻曰蒼精渠肩之人能通神靈之意也必犧時質樸作易以爲政令而不書但以畫其事之形象而

已

稽帝文

御覽

七十

尚書中候曰帝軒提像配永循環

注云黃帝軒轅觀攝

提之象配而行之以長爲順斗機爲政焉

天地休通五行期化河龍圖出洛

出龜書曰威赤文像

疑綠字

字以授軒轅又

八十

春秋運

斗樞曰舜以太尉受號卽位爲天子五年二月東巡狩  
至於中月與三公諸侯臨觀黃龍五彩負圖出置舜前  
圖以黃玉爲匣如樞長三尺廣八寸厚一寸四合而連  
有戶白玉檢黃金繩爲泥封兩端章曰天黃帝符璽五  
字廣袤各三寸深四分鳥文舜與大司空禹臨侯望博  
等三十人集發圖玄色而綈狀可舒卷長三尺二寸廣



九寸中有七十二帝地形之制天文官位度之差

修洛邑

宅京記光武本紀建武元年冬十月癸丑車駕入洛陽

幸南宮却非殿遂定都焉十四年春正月起南宮前殿

明帝紀永平三年起北宮及諸官府

永平五年自長安迎取飛廉并銅馬

置上西門外名平樂觀晉書食貨志永平五年冬十

年作常滿倉立粟市於城東粟斛直錢二十

月北宮成  
蔡質漢典職儀曰南宮至北宮中央作大屋  
複道三道行天子從中道從官夾左右十步

一衛兩宮相去七里

禮威盛容

禮無義當從文選作寢言寢兵威而盛禮容也

范氏施御

博物志禹使范成光御之行域外抱朴子外篇禹乘二龍郭氏爲馭王應麟曰括地圖云夏德盛二龍降之禹使范氏御之行程南方

旨酒萬鍾

周官酒正職注三酒益之者以飲諸臣若今常滿尊也又宋書禮志正旦元會設白虎尊於殿庭樽蓋上施白虎若有能獻直言者則發此尊飲酒按白虎尊亦漢制杜舉之遺式也常滿尊卽淮南子繆稱訓聖人之道猶中衢尊過者斟酌多少各得所宜舊唐書李敬玄傳懷

州刺史李文陳調率金銀造常滿尊元時名爲酒海

親萬方之歡娛

孝經孝治章明王得萬國之歡心以事其先王

注 捐珠玉於五湖之川

新語術事篇句上有禹字

鏡至清

管子心術能戴大圓者體乎大方鏡大清者視乎大明

萬方輻湊

文子上仁篇百官修達羣臣輻湊

披瑞圖

隋經籍志有瑞應圖二卷瑞圖贊二卷祥瑞圖十一卷  
獲白雉兮效素鳥

文選此下有嘉祥阜兮集皇都一句

稽首譯官

百官表大鴻臚屬有譯官令

于德不台

史記作不憚索隱引大傳作不怡江聲曰偽古文作不  
覃開元本作弗嗣按史記自敘曰唐堯遜位虞舜不台  
索隱台音怡悅也李善注典引引尚書舜讓於德不台則古尚

書實作不台王鳴盛曰王莽傳引書云舜讓於德不嗣

則古文本作嗣也

注 交質不及五伯

穀梁傳作交質子不及二伯范甯云二伯謂齊桓晉文

為弈乎千載

詩傳為大兒方言弈大也文選注為弈光曜流行

窮祥極瑞者

唐六典禮部凡祥瑞應見皆辨其物名若大瑞謂景星

星真人河精麟鳳鸞比翼鳥同心鳥永樂鳥富貴吉上

利神龜龍騶虞白澤神馬龍馬澤馬角端獬豸之類

瑞謂三角獸九尾狐白狐白鹿玄鶴青鳥三足鳥赤雀

甘露福草禮草萍實玉羊玉芝黃銀珊瑚鉤載日璧

雞起中瑞喜福並紫脫常生寶連闕達善第草木長生

類之下瑞謂秬秠嘉禾芝草華平人參木連理皆有等差若大瑞隨即表奏

文武百寮詣闕奉賀其他並年終員外郎具表以聞

勤恁

廣雅釋詁恁思也

五繇之碩慮

洪範鄭注卜五占之用謂雨濟圉冢克也孔疏灼龜爲兆其塋圻形狀有五今之用龜其兆橫者爲土立者爲木斜向經者爲金背經者爲火因兆而細曲者爲水不知與此五者同異如何按唐六典太卜令凡兆以千里徑爲母徑卽孔疏之經此誤兩翼爲外正立爲木正橫爲土內高

爲金外高爲火細長芒動爲水兆有俯仰伏倚著落起  
發摧折斷動之狀而知其吉凶凡五兆皆有繇故此云  
五繇也

賦銘誄頌

藝文類聚有班固竇將軍北征頌御覽

五百九十六

有班固

馬仲都哀辭古文苑有高祖沛泗水亭碑銘十八侯銘

五百八十八

文章流別曰班固爲安豐戴侯頌與魯頌體意

相類

凡四十一篇

古文苑有班固奕旨藝文類聚有班固擬連珠按御覽

五百傳玄敘連珠者興於漢章帝之世班固賈逵傳敘  
三子受詔作之班固喻美辭壯文體弘麗最得其體范  
史遺之

論不敘殺身成仁之爲美

尋論者之意謂如王章傳贊云不量輕重以陷刑戮何  
武王嘉師丹傳云依世則廢道違俗則危殆翟義傳云  
義不量力以覆其宗詞旨骯靡以此譏固耳章懷注徒  
以游俠傳論有殺身成名之語而固斷爲罪不容誅遂  
謂舉此譏固失華范之本意矣

後漢書疏證卷三



浙江書局刊

高念曾校

陳其榮校

陳謨校